

Bantuan Malaysia Bantu Kurangkan Penderitaan Rakyat Palestin
Bernama
30 Julai, 2012
Oleh Saleh Jadallah

GAZA CITY, 30 Julai (Bernama) -- Persatuan Aman Palestin, yang aktiviti amalnya dibiayai oleh rakyat dan organisasi di Malaysia, telah mula melaksanakan beberapa projek kemanusiaan bertujuan membantu penduduk miskin dan memerlukan di Semenanjung Gaza.

Projek itu termasuk makanan untuk berbuka puasa, bantuan kewangan, hamper makanan dan pakaian.

Kelembapan ekonomi memburukkan lagi keadaan kehidupan harian di kawasan itu, mengakibatkan penduduk berdepan kemiskinan tegar.

Dalam kajian baru-baru ini yang dijalankan oleh Agensi Bantuan dan Kerja Awam Pertubuhan Bangsa-bangsa Bersatu (UNRWA), kadar kemiskinan di semenanjung yang sesak dengan penduduk itu dianggarkan 38 peratus berikutan kadar pengangguran telah mencecah 28 peratus.

Omar Seyam, Ketua Pegawai Eksekutif Aman Palestin bagi wilayah-wilayah diduduki di Palestin, berkata organisasinya itu berusaha keras untuk meringankan penderitaan penduduk Palestin.

Seyam berkata persatuan amalnya itu telah mengumpulkan USD120,000 sebagai sumbangan untuk projek-projek Ramadan dan menurutnya amaun itu akan diagihkan secara samarata kepada kalangan penduduk miskin.

"Kami bekerja siang dan malam untuk meringankan penderitaan penduduk Palestin, tetapi kami perlu pertingkatkan misi kami pada Ramadan.

"Mesej saya kepada rakyat Malaysia ialah sumbangan anda akan diberikan kepada penduduk yang memerlukan di kawasan-kawasan yang diduduki (Israel) di Palestin," kata Seyam kepada Bernama.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=684147>

